

REGIONAL NEWS

HEADLINES:-

1. Aizawl Veng pahnih Kulikawn leh Salem Veng ah tunlai hian vawk pul hri, African Swine Fever (ASF) a leng a, vawk eng emaw zat an thi tawh.
2. Mizo Academy of Letters (MAL) lehkhabu tha ber atana thlan, 'Pangparhnima' tih ziaktu Ahmangaihi Khiangte hnenah 'Book of the year 2023' hlan a ni .
3. Lok Sabha inthlan thawh hnihna atana campaign chuan a vawrtawp a thleng mek a, naktukah campaign hun a tawp ang.
4. Khawlumin ramchung khawchhak lam ni li chungh ala tuam dawn niin India Meteorological Department chuan a sawi.

<><><>

ASF

Aizawl Veng pahnih Kulikawn leh Salem Veng ah tunlai hian vawk pul hri, African Swine Fever (ASF) a leng mek a, vawk eng emaw zat an thi tawh a ni.

AH & VETY Department Aizawl chuan ni 17 khan Vawk hri leng darh zel tur dan nan hri lenna veng te chu Infected Area ah alo puang tawh a. MAH& VS, Deputy Director Dr M.Zohmingthangi chuan African Swine Fever hian kum 2021 atang khan Mizoram a chenchilh tawh tih sawiin vawin thleng in tih reh ala nilo a ti a, tun hnaia boruak rawn lum chhoh avang in he hri hi a rawn darh leh a mipuite fimkhur a ngai a ti.

Nimin thlenga ASF vanga vawk thi tawh zat hi 174 a ni tawh a, ASF vanga vawk suat tawh zawng zawng zat hi 68 a ni tawh bawk. ASF hi mihring in kai thei lo mahse thawmhnaw hak te, vawksa silna thli atang te in ran vulh vawk ah leh sanghal ten an kai thei thung a ni.

Tunlaia Mizoram leh thenawm state-ah African Swine Fever leng hian ziaawm lam a pan theih loh avangin he hri laka Mamit District mipuite ranvulh an lo him theih nan Additional District Magistrate chuan thuchhuah siamin District danga ASF lenna atangin vawk, vawksa leh a rep atanga siam ei tur Mamit District chhungah lakluh khap a ni.

<><><>

SAITUAL DC PRESS CONF

Saitual District-a Polling Party te chetvelnaa Maxicab hman chungchangah inremna ang lo deuha lirthei hman man inpek a awm nia sawi, social media-ah tarlan chungchang chu Saitual District Election Officer Dr.Lalngura Tlau chuan a sawifiah a, he thil hi Sawrkar, DC Office leh District hmingchhiat theihna a nih avangin pawia a tih thu sawiin thil awmzia hriat chian tawk loh vang a ni a ti Maxicab bik hman chungchangah hian Maxicab Owners Association hruaitute chu inremna siampui an ni a, kum hmasa State Assembly-2023 inthlana inremna lo siam tawh angin kalpui leh tura inbiakna piah lamah MLA inthlana ni khata hire rate Rs. 5,500/- chu Rs.6,000/-ah tihsansak an ni a. Hemi bakah hian an chaw ei man tur pek an ni bawk. He inremnaah hian Driver tam zawk chu an lungawi laiin, V Laldusaka, Ngopa Maxicab Driver leh a thurualpui mi pali panga vel ten midang lungawi tawh pawh la lo turin an thlem a, mahse a tam zawk hian lungawi takin an pawisa dawn tur chu an la fel vek a ni a ti a. Driver dang thurualpui tur an hmuh zawh tak loh avangin V Laldusaka leh a

thuralpuite pawh hian hire man chu an la leh vek tho a, APR pawh an sign thlap bawka ti a.

Thu dik ziktluak lo leh thil awmzia dik tak hriat chian a nih hma-in Khawlbawm channel neitu, Lalmingsanga, Hmingtea tia koh bawk, Lunglei Farm Veng chuan You Tube lamah thudik ziktluak lo leh zeldin thu hmangin Dc Office chu a chhuah hmingcheia a ni an ti a, .

He channel neitu hian thil awmzia a hriat hnuah chuan a video lo siam tawh chu delete-in a sawifiahna video pawh a dah thar leh tawh ni. Maxicab driver te hi a theih chin chinah duat leh duhsak an ni a, thlen in chungchangah te, ei leh in chungchangah te harsatna an tawh loh nan leh anmahni Polling Station-a vote an thlak theih nan te an khaw hnaivaia an duty dan tur ruahmansak an ni. Tin, Driver te hi P-2 a an rawn din luh zan tih loh chu an ei leh in man pawh tumsak vek an ni a ti.

Hetianga intihmualphona leh intihhmingchhiat tumna hi tun hnu-ah chuan thleng tawh lo se a duhawm hle a. A thleng nawn leh a nih chuan rorelna sang zawk Court-a chinfel tura hma lak a ni ang an ti a ni.

<><><>

MAL BOOK OF THE YEAR

Mizo Academy of Letters (MAL) chuan vawiin khan kum 2023 chhunga lehkhabu ṭha ber atana an thlan, 'Pangparhnima' tih ziaktu Ahmangaihi Khiangte hnenah 'Book of the year 2023' an hlan.

Book of the year hlanna inkhawm ni paha MAL Diamond Jubilee lawmna inkhawm hi Chanmari YMA Hall-ah neih a ni a. Inkhawm hi MAL President, Prof. RL Thanmawia chuan a kaihruai a, MBSE Chairman Pu JH Zoremthangan hmanpuiin Book of the year lawmman hi a hlan a. Chawimawina hian thuziak chei (Citation) leh tangka fai Rs. 10000 a keng tel a ni.

Kum 2023 chhung khan MAL chhinchhiah dan chuan lehkhabu 170 a chhuak a. Heng zingah hian Ahmangaihi Khiangte ziak 'Pangparhnima' tih chu Book of the Year, 2023 atana thlan a ni. He lehkhabu hi thawnthu phuahchawp a ni a, a thawnthu phuah dan leh a changtutea duan dan a danglam avang leh a ṭhat avangin Book of the Year atan hian thlan a ni a, pheik 500 chuanga chhah a ni. Youtube lamah ngaihthlak theihin a awm bawk a ni.

MAL hi kum 1964 khan din a ni a, kumin hi a kum 60 na a ni a, Jubilee pual hian MAL leh MBSE ṭangkawp chuan chawhnu lamah seminar an buatsaih a. Chawhnu inkhawm hi Prof. Rualkhuma Colney, MAL Vice President chuan a kaihruai a. Hetah hian 'Tunlai Mizo Thu leh Hla Thlirna' tih chu Dr. H.Laldinmawia, Asst. General Secretary, MAL chuan a sawi a. 'Mizo ṭawng kalhmang: Linguistic lam aṭanga thlirna' tih chu Dr.Lattleipuii, EC Member, MAL chuan a sawi thug a ni.

<><><>

ALL MIZORAM WOMEN FEDERATION

All Mizoram Women Federation (AMWF) chuan vawiin khan hmeichhe MLA pathum Pi Lalrinpuii, Cabinet Minister Pi Baryl Vanneihsanghi MLA leh Pi Prova Chakma, MLA hnenah MLA inthlan a thlan tlin an nih lawmpuina hun I & PR Auditorium ah an buatsaih a.

He hun ah hian AMWF chanchin leh thil tum in hrilh hriat na leh International Women's Day 2024 thupui Count her in: Invest In Women: Accelerate Progress tih zirho a ni a, an thupui hi -Telh Ve La: Ring Ngam La: Hlawhtlinna I hmu ang tih a ni.

All Mizoram Women Federation (AMWF) hi Mizoram State Social Welfare Board din a ni a, Mizoram chhunga cheng hmeichhia zawng zawng te huapzo tura din a ni. AMWF chuan Mizorama women NGO awm sa te chu an do loh thu an sawi a, heng NGO ten thawh ho na tha an neih theih dan tur kawng a zawnpui zawk thin thu an sawi. AMWF Vice President Prof. Lalneihzovi chuan Mizoram ah hmeichhe tana siam NGO hrang hrang awm tawh mahse state puma hmeichhia zawng zawng huam thei NGO an la awm loh avangin leh hmeichhia ten chi leh hnam thliarna awm lova thawhho tha an neih theih nan he NGO hi din an ni a ti. All Mizoram Women Federation chuan an hmahlir chu Mizoram chhunga hmeichhia zawng zawng thukhat vuaa hmeichhiate leh Mizoram tana thil tha tih kawnga lungrual taka ke pen tlan a nih theih nan hmalak a ni an ti a. Mizoram hmeichhia zawng zawngin hma an sawn a, hnam tlem ber hmeichhiate pawhin hnam tam ber hmeichhiate hmasawna te ral thlir mai lova zar an inzo tawn theuhna tura thawhona tha neih chu an thil tum ber a nih thu an sawi baw.

<><><>

27 PEOPLE DIED OF DRUG ABUSE

Kuminah ni 100 chhungin ruihhlo hman sual avangin Mizoram ah mi 27 an thi tawh.

Excise and Narcotics department-in an chhinchhiah danin kumin January ni 1 leh April ni 12 inkar chung khan ruihhlo avangin Mizoram ah hmeichhia 6 leh mipa 21 an thi leh hman tawh a. An zinga mi 18 hi heroin a inchiu thin an ni a, mi dang 9 chu heroin leh damdawi dang hman kawp vanga nunna chan an ni.

Kum 1984-a Excise and Narcotics department-in ruihhlo avanga nunna chan mipa pakhat, heroin hmang thin an chhinchhiah tan atangin tun thleng hian ruihhlo vanga thi hi mi 1,839 an awm tawh a, an zinga 1,616 hi mipa an ni a, hmeichhia 223 an awm tawh baw. Ruihhlo vanga thi zinga mi 1,161 hi proxyvon leh parvon spa vanga thi an ni a, mi 427 chu damdawi dang hmang an ni a, heroin vanga thi hi mi 251 an awm a ni. Nikum khan damdawi hmansual avangin mi 76-in nunna an chan a, an zinga 64 hi mipa an ni a, 12 hi hmeichhia an ni. An vai hian heroin leh ruihhlo dang khawih pawlh vek an ni.

Mizoram hi Golden Triangle leh hmun dang ruihhlo siam chhuahna atanga Myanmar kal tlanga dan kalha ruihhlo tawlhna kawngpui ber pakhat a ni a. Kum 2021 February thla a Myanmar a mipui thlan sorkar paihthla a sipaite'n thuneihna an hnehchhuh atang khan nasa takin ruihhlo tawlh ruk hi a pung a. Dan kengkawhtute'n ruihhlo an man thin pawh nasa taka pungin tum khata an man pawh a hlawm a lian hle a ni.

<><><>

FOREIGN CIGGARETTE

Tukin dar 8 leh achanve vel khan Mamit Police, Dapchhuah police check post a duty te chuan ramdang meizial dan phal loh a lak luh thahnem tak an man. Wawiin vek khan Aizawl Custom office lamah thawn nghal an ni.

Mamit Police Dapchhuah police check post a duty te chuan ramdang meizial pickup truck 4 hmanga an phurh te chu an lo man a, heng ramdang meizial te hi case 220 a tam niin tualchung whole rate chuan cheng nuai 48 sing 4 za 5 hu a chhut a ni a, meizial case 1 ah hian meizial box 50 zel a awm a ni.

Dapchhuah Police check post-a ramdang meizial dan phalloh an man te hi pickup truck 4 hmanga phurh niin Aizawl atanga lo phurh thlak Kanhmun a dah tur a ni a, aneitute hi Remruati, Dami leh Siana Kanhmun khua vek te niin police te chuan an sawi.

Dan phalloh ramdang meizial an man te hi Mamit police hmunah endik anih hnuah meizial te hi Mamit police truck hmangin a phurhna lirthei te nen Aizawl Custom office lamah thawn chhoh an ni.

<><><>

STORM RAVAGES 4 DISTRICT OF MIZORAM

Tun hnaia ruah, thlipui leh rial thawk avanga chiatna thlengah Mizoram hmun hrang hranga in chhia 456 a awm a, chhiatna thlenga hian mi pakhat hliam awmin damdawi inah hruai a ni.

State Disaster Management and Rehabilitation Department hotute tarlan danin kar hmasa inrinni, Pathianni leh thawhtanni-a ruah, thlipui leh rial thawk hi Mizoram chhunga district 4 te chuan an tuar na bik a, Aizawl, Kolasib, Champhai leh Khawzawl District ah tihchhiat a nei nual a ni.

Thlipui leh rial tla in a tihchhiat zingah hian UPC-NEI biakin leh Tualte khuaa Presbyterian biakin a tel a, Kolasib District ah Anganwadi leh Sawrkar building pawimawh bakah chenna in chhia a awm nual a ni.

Kolasib District ah hian chenna in 265 zet chhia awmin mipui sing 1, sang 3976 a nghawng pha a, chenna in tihchhiat ah hian rangva in chauh nilo concrete building te pawh telin Kolasib District ah hian Kolasib khawpui bakah Thingdawl khua chu a tuar na zual an ni.

Sawrkar hotute sawi danin Aizawl district-ah building 178 chhia awmin hei hian mi engzat nge nghawng a neih hriat a nilo a, Falkawn khuaa hmeichhe pakhat chu a chenna in thlipui na takin a tihchhiat na ah a inhliam a, State Referral Hospital-Falkawn ah enkawl mek a ni.

Heng bakah hian Champhai District ah North Khawbung, Kahrawt leh Bungzung khua ah te chenna in chhia awmin Khawzawl District ah Biakin 2 chhia bakah chenna in chhia 10 a awm a ni.

DMR hotute sawi danin chhiatna tawh chungte hnenah hian an mamawh ang silpaulin pek an ni a, State Disaster Response Fund (SDRF) hnuai ah chhawmdawl na pek a nih tur thu an sawi bawh.

<><><>

LOK SABHA

Lok Sabha inthlan thawh hnihna atana campaign chuan a vawrtawp a thleng mek a, naktukah campaign hun a tawp ang. Vawiin khan hmun hrang hrangah political party hruaituten vantlang inkhawm buatsaihin ngawrh takin an campaign a. Inthlan thawh hnihnaah hian Parliament constituency 89 ah vote thlak tur a ni a. State 13 leh Union Territory pakhatah vote thlak a ni ang.

Union Home Minister Amit Shaha chuan Congress hruaitu P Chidambarama'n I.N.D.I.A bloc an sawrkar chuan CAA an sut dawn nia a sawi chu na takin a dem a. Inthlana chak an tum danah mi tlawn ringawtin an au a ti a. NDA sawrkar chuan mitin tana rorelna dik pek a tum tih sawiin CAA pawh sut a ni lo ang a ti bawh. Pu Shaha hian vawiin tlaiah Bengaluru-ah hun a hmang leh dawn a ni.

Congress General Secretary Priyanka Gandhi Vadra pawhin vawiin khan Chitradurga leh Bangalore South Parliamentary Constituency ahte thu a sawi a. Karnataka Aam Aadmi party President Mukhyamanti Chandrua'n a tawiawm a ni.

<><><>

WEATHER

Khawlumin ramchung khawchhak lam ni li chung ala tuam dawn niin India Meteorological Department chuan a sawi. Khawlum heatwave hi West Bengal-a Ganges bulhnaiahte, Karnataka ram laili laite, Odisha, East Uttar Pradesh, West Uttar Pradesh, Bihar leh Jharkhand ah te khua a lum zual dawn niin IMD chuan a hrilhlawk a. Odisha, Rayalaseema, Gangetic West Bengal, Jharkhand, Vidarbha, Chhattisgarh, southwest Madhya Pradesh, Telangana leh Coastal Andhra Pradesh ah te khaw lum dan hi celsius degree 42 atanga 45 inkar te a ni dawn niin a tarlang ani.

Hetihlai hian naktukah hian hmarchhakah ruah nasa tak thei anih thu a tarlang a. Arunachal Pradesh, Assam, Meghalaya, Nagaland, Manipur, Mizoram leh Tripura ah te ruah nasa vaklo a sur dawn niin a hrilhlawk

<><><>

DGCA

Directorate General of Civil Aviation chuan naupang kum 12 chin hnuailamte an nu leh pa leh chungte bulah seat pe zel tawh turin Airlines thuneitute a hriattir. DGCA thuchhuah danin thlawhna engemawzatah kum 12 hnuailam an nu leh pa leh chungte bula seat nei lo an awm tih hriat a ni a. Hei vang hian tuna kalphung hman mek chu tihdanglam a ni tih tarlan a ni.

<><><>